

Prvi zamjenik visokog predstavnika i članovi Predsjedništva BiH posjetili Višegrad

Prvi zamjenik visokog predstavnika, Donald Hays, danas je boravio u posjeti Višegradu, zajedno sa članovima Predsjedništva BiH, Berizom Belkićem, Živkom Radišićem i Jozom Križanovićem. Ambasador Hays i članovi Predsjedništva susreli su se sa povratnicima u tom području, predstavnicima lokalnih organa vlasti, poduzetnicima i predstavnicima omladine.

Obraćajući se predstavnicima organa vlasti Višegrada, ambasador Hays je naglasio da se ulažu naponi da se održi nivo finansiranja procesa povratka od strane međunarodne zajednice, uprkos činjenici da se ukupna strana pomoć za BiH drastično smanjuje, te je pozvao Ministarstvo za izbjeglice i raseljena lica Republike Srpske da nastavi sa osiguranjem sredstava za podsticanje dvosmjernog povratka.

Ambasador Hays je takođe naglasio da lokalni organi mogu efikasno pružiti pomoć procesu povratka tako što će riješiti probleme sa infrastrukturom i olakšati postupak obnavljanja komunalnih usluga za domaćinstva.

Provedba imovinskih zakona za Višegrad sada iznosi 35 posto, što predstavlja značajan pomak. Međutim, ovo je i dalje daleko ispod prosjeka za cijelu zemlju. Ambasador Hays je primijetio da Višegrad, kome su prijeko potrebne direktne investicije, neće privući značajnija komercijalna sredstva sve dok je stopa implementacije imovinskih zakona na sadašnjem skromnom nivou. Investitori neće ulagati novac u one zajednice koje nemaju aktivan pristup procesu povratka. Razlozi za takav stav su izraženi i u činjenici da programi koji podstiču

povratak, odnosno vladavina prava, uklanjanje birokratskih prepreka i razvoj društvene infrastrukture, odnosno škola, zdravstva i stambenog fonda, takođe podstiču investicije.

U toku razgovora za okruglim stolom sa predstavnicima omladine, ambasador Hays je pozvao omladinu da se politički aktivira. U regiji u kojoj su vladajuće stranke bile posebno neuspješne na planu ekonomskog oporavka, važno je da se čuje glas mladih i da omladina unese svoju kreativnost i energiju u političke procese, rekao je on.

“Od suštinskog je značaja da glasate na oktobarskim izborima,” rekao je prvi zamjenik visokog predstavnika u svom obraćanju mladim ljudima. “Omladina može biti jedan od odlučujućih faktora u tome da li će doći do povratka ekstremizma praćenog ekonomskom stagnacijom ili do prelaska na modernu demokratsku politiku praćenu ekonomskim rastom.”

Članovi Predsjedništva su također naglasili da mladi predstavljaju ključni faktor u bh. političkom, društvenom i privrednom razvoju. Predsjedavajući Predsjedništva Belkić je opisao izbor između organizovanja političke aktivnosti na osnovu nacionalne pripadnosti ili na osnovu interesa i dobio jednoglasnu podršku od prisutnih da bi ekonomski interes umjesto nacionalnog opredjeljenja trebao biti osnovna motivacija za politički angažman. Član Predsjedništva Radišić je rekao da će Predsjedništvo pomoći mladim ljudima da se izbore za svoja prava. Također je naglasio koliko je za BiH važna demokratska Republika Srpska kao i koliko je za Republiku Srpsku važna demokratska BiH. Član Predsjedništva Križanović je istakao da je u protekle dvije godine BiH postigla značajan napredak, iako je ostalo još mnogo toga što treba uraditi. Dogovoreno je da delegacija koja će biti sastavljena od predstavnika mladih iz cijele BiH prisustvuje narednoj sjednici Predsjedništva kako bi postavili pitanja koja su od najvećeg interesa za omladinu. Članovi Predsjedništva i ambasador Hays su postigli potpunu saglasnost po pitanju budućeg razvoja BiH.

Obraćajući se povratnicima, ambasador Hays se osvrnuo na učinak lokalnih organa vlasti, nevladinih organizacija i međunarodnih organizacija, uključujući i OHR, u podsticanju povratka, te je najavio mogućnost obezbjeđivanja stočnog fonda, opreme, traktora i motokultivatora za poljoprivrednu zadruhu povratnika koja će se uskoro formirati.